

Friday, January 14th, 2011

## Դեկտեմբեր Ամսուան Ձեռնարկներ՝ Հայ Քոյրերու Վարժարանէն Ներս



### ԼԻՆՏԱ ԳԱՆՏԻԼԵԱՆ

Դեկտեմբեր ամիս. Լոս Անճելըսի Հայ Քոյրերու վարժարանը, բանիւ եւ գործով, լիացած էր Ս. Ծննդեան խորհուրդով: Ջարդարանքներով, դասարաններէն արձագանգող արտասանութիւններով, երգերով եւ երաժշտութեամբ, ամսուան յատուկ աղօթքներով ու շարականներու երգեցողութեամբ, վարժարանին մթ-նոյրտըր տօնական, ջերմ եւ ուրախ էր:

Մանկապարտեզէն մինչեւ ութերորդ դասարանի աշակերտները, իրենց դասերու կողքին, տօնական օրերու նախօրեակին նաեւ լծուեցան Ծննդեան հանդիսութեան պատրաստութեան՝ ըլլան անոնք Կաղանդի յատուկ դասարանային աշխատանքներ կամ խմբային երգչախումբի փորձեր, թատրոնի պատրաստութիւն, որոնք անգամ մը եւս վարժարանը վերածեցին մեղուաբերակի մը:

Դեկտեմբեր 4ին, վարժարանը մասնակցեցաւ Մոնթրոզ քաղաքի Ծննդեան աւանդական փառատօնին: Մեծ խումբ մը աշակերտներ, կազմակերպութեամբ աշակերտական խորհուրդին, աւետեցին Քրիստոսի գալուստը՝ ներկայացնելով Յիսուսի Ծնունդը կենդանի պատկերով մը. խումբին կ'ընկերակցէին վարժարանիս քոյրերը, ուսուցչուհի Յոդիկ Մելքոնեանը եւ ծնողներ:

Տօնական օրերուն կարիքաւորին օգնելու աշխատանքին աշակերտները մասնակից դարձնելու եւ այս գեղեցիկ ունակութիւնը անոնց մօտ արմատացնելու նպատակով, այս տարի դարձեալ վարժարանը կազմակերպեց չփճացող ուտեստեղէնի հաւաք, գործնականացնելով քրիստոնէական կրօնքի բարոյական դաստիարակութիւնը: Այս աշխատանքին հետապնդումն ու դասաւորումը յաջողութեամբ կատարեց աշակերտական խորհուրդը: Քաջալերելի էր այս ուղղութեամբ աշակերտներու ցուցաբերած գործակցութիւնը: Յիշենք, որ մեծ քանակութեամբ հաւաքուած ուտեստեղէնը ամբողջութեամբ փոխանցուեցաւ ՀՕՄի կեդրոն՝ որպէս գործակցութիւն հարիւրամեայ բարեսիրական միութեան աշխատանքներուն:

Վարժարանը, ըստ աւանդութեան, այս տարի եւս ունեցաւ Ծննդեան զոյգ հանդէսներ՝ մանկապարտէզի եւ նախակրթարանի բաժիններով, երկու յատուկ օրերու ընթացքին, հոգեկան մեծ հաճոյք եւ հրճուանք պատճառելով ծնողներուն ու վարժարանի մեծ ընտանիքին:

Շաբաթ, Դեկտեմբեր 18ին տեղի ունեցաւ Մանկապարտէզի հանդէսը, վարժարանիս «Դանիէլեան» սրահէն ներս, ներկայութեամբ հոծ բազմութեան: Հանդիսութեան բացումը կատարեց մանկապարտէզի տնօրէնուհի Սօնա Գազանճեան: Ան բարի գալուստի խօսքով տուաւ նուէր ստանալու եւ տալու իմաստը՝ զայն յորջորջելով ժամանակաւոր եւ անցողակի, իսկ մեր նուէրները, ըսաւ ան, «Ձեր զուակներն են, որոնք մեզի կու գան ամէն Սեպտեմբեր ամսուն. անոնք մնայուն են եւ մեզի երջանկութիւն կը պատճառեն»:

Բացման խօսքէն ետք, մանկապարտէզի աշակերտները ներկայացուցին Յիսուսի Ծնունդը՝ երգախառն թատերգութեամբ, սկսելով աւետումէն, Գալիլիոյ մէջ տեղի ունեցած մարդահամարէն, Յովսէփի եւ Մարիամի դժուարին վիճակէն մինչեւ Ծնունդը, մոզերու, հովիւներու գալուստը եւ աւետիսը: Աշակերտները, իրենց մանկական անմեղ արտայայտութեամբ, պատմելէ ետք Ս. Ծննդեան պատմութիւնը, երգեցին ու աւետեցին Փրկչին գալուստը, սիրոյ եւ խաղաղութեան պատգամը տալով բոլորին:

Երգերը կը դեկավարէր ու դաշնակի վրայ աշակերտներուն կ'ընկերակցէր վարժարանիս երաժշտութեան ուսուցչուհի Վարդուհի Պաղտասարեանը: Հանդիսութեան վերջաւորութեան սրտի խօսքով հանդէս եկաւ վարժարանի տնօրէնուհի քոյր Լուսիան, որ իր գոհունակութիւնը յայտնեց՝ ի տես փոքրերուն կողմէ Օննդեան շարականներու հարագատ մեկնաբանութեան, ապա շնորհակալութիւն յայտնեց պատրաստող նուիրեալներուն եւ տօնական բարեմաղթութիւններով փակեց հանդիսութիւնը:

Դեկտեմբեր 22ի երեկոյեան, վարժարանի շրջափակը, հակառակ անդադրում անձրեւներուն, վերածուած էր հաճելի զբօսավայրի մը: Աշակերտութիւնը, ծնողները, շրջանաւարտ աշակերտները իրարու կը հանդիպէին տօնական տրամադրութեամբ, նախակրթարանի երգահանդէսին առիթով, որ նուիրուած էր Ս. Օննդեան եւ Ամանորի տօներուն:

Հանդիսութիւնը բաժնուած էր երեք մասերու. նախ ներկայացան փոքր դասարանի աշակերտները, ապա՝ երկրորդ բաժինով՝ երրորդ եւ չորրորդ կարգերու աշակերտութիւնը, իսկ վերջաւորութեան՝ հինգերորդ եւ վեցերորդ դասարանները: Առաջին հերթին, խորհրդաւոր մթութեան մէջ, վարժարանիս «Դանիէլեան» սրահ մուտք գործեցին փոքր դասարաններու աշակերտները՝ վառ մոմիկներով, նախապատրաստելով հանդիսատէսը եւ ստեղծելով օրուան պատշաճ մթնոլորտ մը: Ապա մթութեան մէջ հնչեց անոնց մեղմիկ եւ զուարթ աւետումը Քրիստոսի յայտնութեան: Հանդիսութիւնը շարունակուեցաւ երկրորդ խումբի երգեցողութեամբ: Երեք լեզուներով, ամանորեան եւ Ս. Օննդեան երգեր եւ շարականներ մեկնաբանուեցան: Անոնք յաճախ համեմուեցան օրուան պատշաճ նուագներով եւ ոտանաւորներով: Այս բաժինի հետաքրքրական եւ ժողովուրդը խանդավառող մասը ձիւնէ մարդն էր՝ Յակոբ Առաքելեանը, իր ճերմակ տարագով, անուշիկ ժպիտով եւ հետաքրքրական շարժումներով: Հետաքրքրական էր նաեւ Ռիթա եւ Մերի Գեօշկերեան քոյրերու եւ Շիրակ Սթամպուլեանի՝ Օննդեան երգի մեկնաբանութիւնը՝ «Chipmunks»-ի ոճով, որ աշխուժացուց մթնոլորտը եւ ներկաները:

Երրորդ մասով բեմ բարձրացան աւելի բարձր դասարանի աշակերտներ, որոնք երգեցին «Խորհուրդ Մեծ եւ Սքանչելի» շարականը: Նախորդներու անմեղունակ եւ եռանդուն մեկնաբանութիւնը տեղի տուաւ աւելի գիտակից եւ ապրումով երգեցողութեան, Կաղանդի աշխոյժ երգերու եւ Օննդեան շարականներու, որոնք յաճախ երեք լեզուներով ներկայացուեցան, երբեմն համեմուեցան մեներգներով եւ ասմունքներով՝ ընկերակցութեամբ երաժշտական զանազան գործիքներու: Սոյն հանդէսը Հայ Քոյրերու վարժարանի աշակերտներուն կողմէ Օննդեան

աւանդական նուէրն էր՝ Ամանորի սեմին, նուիրուած ծնողներուն:  
Տնօրէնութեան, ուսուցչական կազմի, ծնողներու եւ աշակերտութեան  
համագործակցութեամբ իրականացած գեղարուեստական սքանչելի սոյն երեկոն  
կ'արդարացնէր Հայ Քոյրերու վարժարանի քրիստոնէական դաստիարակութեան  
սկզբունքը՝ աշակերտները պահելով հայ խօսքի, երգի եւ շարականի երգեցողութեան  
մթնոլորտին մէջ՝ ի գոհունակութիւն դաստիարակին եւ ծնողքին: